

# ALAHADY FAHA 16 MANDAVANTAONA – A2020



## MANANA FAHARETANA ANDRIAMANITRA ARY MAMINDRA FO

Ry Kristianina havana, sahiran-tsaina tokoa isika mianakavy miatrika izao areti-mandoza izao. Izao indrindra anefa no tsy tokony hiraviravy tanana isika. Izao indrindra tokoa no tsy maintsy anaovantsika vavaka totoafy mba hihavao tokoa ny fo amam-panahintsika fa indrindra ny fon'ny EOV MISIONERA REHETRA MBA HO TABERNAKLA VELONA TOKOA isika miatrika izao fahavalo tsy hita maso mandripaka izao. Tsy fanorenana fotsiny no handrasantsika fa Pantekôty vaovao. Fihavaozana lavitry ny herisetra, ny hetraketraka mpanapotika ka samy hitafy ny Fanahy Masina. Mpanavao isika ka hiroso amin'ny fametrahana ny rafitra hirosoantsika amin'ny fampandrosoana mampivelatra ny mahaolona sy olona manontolo ivelomantsika ny maha-kristianina antsika hahatonga ny diosezintsika ho diosezy maitso, ho diosezy feno fanantenana niany, anio tokoa ny ho avy fa tsy rahampitso, tsy amaray: TARAKA MANORINA FA TSY SANATRIA TARAKA MANDRODANA.

Vakiteny I : Fah. 12, 13. 16-19

Tononkira : Salamo 85

Vakiteny II : Rôm. 8, 26-27

Evanjely : Mt. 13, 24-43

Amin'izao Alahady faha-16 mandavantaona izao dia mampianatra sy manambara amintsika ny tenin'Andriamanitra fa Andriamanitra maharitra tokoa Izy, mamindra fo, mahandry, tsy mivadika amin'ny fanekeny. Ray mpamindra fo Andriamanitra, izy no mitondra antsika

amin'ny fiainana feno famindram-po.

Ambaran'ny vakiteny voalohany *“Tsy misy Andriamanitra hafa afa-tsy lanao ihany, izay mitandrina ny zavatra rehetra, mba hahenoana fa tsy manao fitsarà-mitanila lanao. Fa ny fahefanao dia fanorenan'ny fahamarinana: ary noho lanao Tompon'ny olona rehetra, no itondranao azy rehetra amim-pamindram-po”*.

Azo lazaina izany fa izao Alahady izao no hanambarantsika fa Ray ny Andriamanintsika ary tsy misy miafina Aminy ny momba antsika. Ray be fitiavana sy famindram-po Izy ary tsy manao fitsarana mitanila fa ny hahasoa antsika no tadiaviny ka aoka àry hatoky Azy isika. Tsy Andriamanitra lavitra no Andriamantsika ka matoky isika fa miara-dalàna amintsika Izy fa indrindra amin'izao ady amin'ity fahavalo tsy hita maso ity

Tian'i Jesoa ambara amintsika ihany raha manao ny fanoharana mikasika ny ahi-dratsy sy ny voa tsara ao amin'ny Evanjely Izy. Fanoharana momba ny fanjakan'ny lanitra. Ny fanjakan'ny lanitra ambaran'i Jesoa eto dia ny fiainantsika andavanandro, ny fontsika izay miara-mitsiry ao ny ahi-dratsy sy ny vary ka hoy Izy: *“Avelao hiara-hitsiry fa rehefa tonga ny fotoana fijinjana dia hisongadina ny vary ka atsipy any amin'ny afo mamaivay ireny ahi-dratsy ireny”*.

Raha misy fotoana hahatsapana fa tena manambara amintsika ny sitrany Andriamanitra amin'ny alalan'ny Teniny vakina amintsika dia izao Alahady faha-16 izao. Ahoana no ahafahantsika milaza izany? Ny zava-misy iainantsika vokatr'ity areti-mandoza ity izay tena ahi-dratsy mitady hanempotra antsika. Ary ny voka-dratsiny tokoa dia zary sempotra isika. Tsy maintsy miady àry isika mba tsy ho sempotra. Matoky izy fa hodoran'ny famindram-pon'Andriamanitra ity virus ity.

Hararaotintsika àry izao fotoana iadiantsika amin'ity fahavalo tsy hita maso ity mba hiverenantsika amin'Andriamanitra ka ho sitrana isika. Aoka hibebaka isika hahafahana miala amin'ireny fiainana ratsy ireny ary izany indrindra no anaovako antso avo ho antsika EOVI MISIONERA. Hararaotintsika izao zava-misy izao fa indrindra isika tanora Génération Coronavirus izay mbola tsy tonga saina fa làlana lehibe iombonana amin'i Jesoa, iombonana amin'ny mpiara-belona, iombonana amin'ny tontolo iainana izao vanim-potoana iadiantsika amin'ity areti-mandoza. Izany no antony anomezana toerana lehibe ny fibebahana na dia tsy mbola afaka mandray ny sakramenta aza isika fa Sakramenta am-panahy mba hiova tokoa ny fontsika ka hivelomantsika ny maha-Kristianina antsika hahatonga antsika ho Kristy mpiara-belona eo anivon'izao tontolo izao, ho EOVI MISIONERA . Hiova ny fanahintsika, hanana ny halemem-panahy ka handova ny lanitra.

Tian'i Jesoa ambara fa Andriamanitra tsy miova ary Ray mandrakizay izy. Hitantsika izany amin'ilay tantaran'ny Ray be fitiavana ao amin'ny Lioka 15, na dia inona ny nataon'ilay zanaka faralahy tamin'ny fitondran-tenany sy ny fanapotehany ny fananany rehetra, dia hafaliana ny an'ny Rainy rehefa niverina sy nibebaka izy ka nomeny hasina sy asa sahaza azy.

Marina mety reraka tokoa isika fa mafy ny ady. Aoka anefa isika hahay hanararaotra izao coronavirus, izao confinement fihibohana mba hihavao tokoa, fa tsy fanorenana fotsiny no andrasana fa tena Pantekôty vaovao. Aoka ho tsapantsika fa na dia eo aza ny fahoriana sy fijaliana dia ao amin'ny Ray no ahazoana ny tena famonjena mitondra amin'ny hafaliana. Misy ny mbola varimbariana sy feno fialonana tahaka an'ilay zanaka lahimatoa, miantso antsika Andriamanitra ary mangoraka antsika Izy, ao Aminy isika no hamokatra be sy handova ity tany ity.

Toy izany koa ny fanoharana momba ny voatsinapy, mety mieritreritra aza isika hoe toa tsy misy fiovana ny fiainana na dia misy ezaka. Ny tian'Andriamanitra dia ilay ezaka ataontsika na dia kely aza, aoka ny fontsika ho tany lonaka hiasan'ny fahasoavan'Andriamanitra, na dia kely toy ny voatsinapy aza dia hitombo tahaka ny mofo asiana lalivay. Tsy isika tokoa fa ny fahasoavan'Andriamanitra miaraka amintsika no mampiova ny fiainantsika hamokatra voa tsara.

Mila ny fahafoizana izany rehetra izany, na ny fanoharana momba ny ahi-dratsy na ny voatsinapy dia manentana antsika hahafoy tena, aza faly mandray fotsiny fa mba hanolotra ihany koa. Izany no finoana velona, mandray isika no sady mahafofy. Aoka izany hafatra soa izany no manentana ny fiainantsika.

Ry Kristianina havana fantaro fa raha tiantsika hisy vokatry tsara eo amin'ny fiainantsika dia aoka tsy handray fotsiny isika fa hahafoy koa, aoka hahafoy fotoana isika, izay mahazatra antsika, hahafoy ho an'i Jesoa isika ka amin'izay, araky ny voalazan'i Md Paoly, dia ny fanahy no hanohana ny fahalementsika. Aoka ho tonga ny fotoana hahatonga antsika ho tena "acteur" fa tsy ho "consommateur" intsony, ho EOVI MISIONERA.

Mety hanontany tena isika satria sady tsy mahafofy tena no tsy mahay mivavaka ka ho lany fotoana amin'ny ezaka atao. Fantaro àry, hoy Md Paoly ao amin'ny Vakiteny faharoa, amin'izao Alahady faha 16 mandavantaona, amin'izao fotoana anaovantsika vavaka totoafo fa mety tsy mahay mivavaka tokoa isika saingy ny fanahy no hanohana antsika amin'izany, *"ny Fanahy no manohana ny fahalementsika, satria na izay mety angatahintsika aza tsy fantatsika, fa ny Tenan'Izy Fanahy ihany no mangataka amin'ny fitarainana tsy hay lazaina; ary Izy mikaroka ny fo no mahalala izay irin'ny Fanahy, sy ny fifonany araka an'Andriamanitra ho an'ny Olomasina."*

Ny tadiavin'Andriamanitra amintsika dia isika hahafoy ho Azy.

Ry Jesoa Tompo ô miatrika izao ady mafy izao izahay. Very fanahy mbola velona. Tsy hita izay aleha. Tena sempotry ny ahi-dratsy izahay. Ianao nefa milaza aoka hiaraka hitsiry hoy ianao aminay. Tsy afaka miady irery izahay fa indrindra miatrika an'ity areti-mandoza ity. Maniry te hihavao marina tokoa izahay, maniry te ho EOVI MISOIONERA TABERNAKLA VELONA izahay, te-handray andraikitra, te-handray an-tànana ny fiainanay nefa eo koa ny rendrarendra izay mamatotra anay, eo ny hamafin'ity ady amin'ity fahavalo tsy hita maso ity. Koa enga anie mba hanana fanetren-tena izahay ka hanolo-tena aminao ry Jesoa. Maharitra sy be famindram-po ianao ka enga anie mba hisy fanapahan-kevitra horaisinay miainga avy amin'izao ady mafy izao mba hiova ny fo amam-panahinay. Amin'izay dia hanana fahalemam-panahy izay nampianarinao anay izahay ka handova ny tany, ho karakarainay tokoa anie ity tany iombonana ity hitondra amin'ny tena fivelarana amin'ny mahaolona manontolo sy ho an'ny olon-drehetra. Ho zary tany lonaka hiasan'ny fahasovan'ny anie ny fo amam-panahinay. Amen

Mompera Arseveka Mgr Benjamin Ramaroson